


## ALAHADY faha-5 KAREMY - TAONA D2022



### « Izay tsy manam-pahotana aminareo no aoka hitora-bato azy voalohany »

Ry Kristianina havana, efa mihamanakaiky tokoa ny fankalazantsika ny Paka, Alahady roa sisa dia mankalaza ny Paka isika ary amin'ny Alahady hoavy dia hankalaza ny sampankazo izay mampiditra antsika amin'ny herinandro lehibe, ny Herinandro masina. Izao Alahady izao amin'ny toerana maro dia alahady fanaovana pelerinajy izay hibanjininantsika ny lakroan'i Kristy, handinihintsika ny Lalan'ny hazofijaliana ka hiombonantsika amin'I Jesoa mijaly sy maty. Miakatra eny amin'ny "La montagne" isika manao pelerinajy, entintsika hiakatra ny fiainantsika fa tsy hirefarefa amin'ny tany izay feno lainga sy fitapitaka ary herisetra. Izany rehetra izany no nahafaty an'i Jesoa teo ambony hazofijaliana noho ny hetraketratsika olombelona, izay no nanolorany ny tenany hamonjena antsika. Mbola manjaka anefa izany ankehitriny, raha mijery ny zava-misy dia toa fiainana biby sanatria ny fiainantsika olombelona indraindray, rentsika etsy sy eroa fa herisetra maro isan-karazany, vono

olona, fiainana mamofady no manjaka. Mila fihavaozana tokoa isika. Izany no mahatonga antsika miatrika izao Sinaody faha-7 izao mba handinihina izany rehetra izany ka miaraka amin'ny fahasovan'Andriamanitra isika handresy ny ratsy fa hanorina fiainam-baovao. Izany ihany koa no ataontsika

Vakiteny I : Iz. 43, 16-21

Tononkira : Sal. 125

Vakiteny II : Fil. 3, 8-14

Evanjely : Jo. 8, 1-11

mamakivaky izao karemy izao mibanjina ny tenin'Andriamanitra manoro antsika ny lalan-kombana mba hahatonga antsika hibebaka hiala amin'ny fiainana mirefarefa amin'ny tany hiakatra ambonimbony kokoa. Ny pelerinajy any amin'ny "La montagne" no hanampy antsika hiakatra amin'Andriamanitra, ka ao anatin'ny fiakarantsika izany no iantsoana antsika hanavao ny fiainana ho tonga Eglizy Olona Velona hivelona ny finoany. Izany finoana izany no ambara amintsika amin'ny Paka.

Ny famolahan-tena tokoa, ny fahafoizana, ny sakrifisy tokoa no angovo manampy antsika hihavao satria mampiombona amin’I Jesoa.

Tsy hoe nofinofy ny fiainana kristianina, tsy hoe Andriamanitra lavitra fa eo anivon’ny fiainantsika ny Andriamanitsika. Raha miara-maty amin’i Kristy amin’ny ratsy rehetra isika : ny lainga, ny fitapitaka dia miara-mitsangana Aminy hahatonga antsika ho taranaka mpanorina, EOY ka manorina Eglizy Tranon’Andriamanitra. Tadidintsika ny teny fanevan’ny Sinaody : EGLIZY OLO VELONA VELOMIN’NY BATEMY MIOMBONA HO OLO ARAIKY MANDRAY AN-TANANA IRAHINA HO MISIONERA TABERNAKLA VELONA. Mitondra antsika hanana fivelarana feno ka hanatsara ny tontolom-piainana izay ifandraisantsika samy isika ao anatin’ny rariny sy ny hitsiny, ao anatin’ny fihavanana sady kristianina no malagasy, hikatsahana ny soa iombonana, hahatonga antsika hahay hampandroso ny olombelona manodidina antsika, hahatonga antsika hanana tontolom-pinoana ahafahantsika midera sy mankalaza an’Andriamanitra ary mivelona ny finoana sy ny fiainana andavanandro.

Ny hananantsika fiainam-baovao, izany no foto-pampianarana tian’ny Eglizy antintranterina amintsika amin’izao Alahady faha-5 amin’ny karemy izao.

Voalaza ao amin’ny vakiteny voalohany *“Aza mahatsiaro ny zavatra lasa intsony, ary aza mihevitra ny zavatra taloha intsony! Fa indro Aho hanao zava-mahagaga vaovao; efa hiposaka izy izao, tsy hahalala izany va ianareo?”*. Aoka ny lasa ho an’ny lasa fa manomboka amin’izao mba ho zava-baovao tokoa ny fiainantsika, ho zava-boaary vaovao. Izany no andrandraintsika amin’izao Paka izao Paka mampiditra antsika lalina amin’ny Sinaody faha-7 iombonantsika amin’ny Sinaody faha-16 erantany. Mampiombona antsika amin’i Jesoa ny eokaristia, ny tany karakaina dia lasa tany lonaka sy feno rano ary velona, manampy antsika hivelatra tokoa ny eokaristia. Izany no antenaintsika amin’izao fotoana efa akaiky ny Paka izao.

Md Paoly mizara amintsika ny traikefany ao amin’ny vakiteny faharoa androany raha nandray an’I Jesoa nandresy ny fahafatesana izy. Izany koa no andrandraintsika amin’izao fanaovantsika ny pelerinajy izao, mba hanao expérience amin’I Jesoa, izy izay nandresy ny ratsy ka mitondra antsika amin’ny fiainam-baovao, Tsara tokoa ny manipika fa izay mifanojo, mitraotro marina amin’I Jesoa dia miova tanteraka. Expériences’I Paoly io. Ka raha misy vavaka, faniriana ho antsika tsiraikiraiky dia enga anie hifampitraotro amin’I Jesoa isika amin’izao pelerinajy izao, amin’ny Sinaody ka hiova tanteraka.

Izany no mahatonga an’i Md Paoly mizara amintsika ny expérience nahatonga azy nahasahy niteny *“rehefa nahazo an’I Kristy aho dia nataoko fakofako izao rehetra izao”*. Ny tiany ambara tsy hoe namono tena izy na nanjary tsy nivelona tahaka ny olona rehetra, sanatria izany, nivelona tahaka ny olona izy fa ny fivelomany an’izany rehetra izany dia ao amin’i Kristy, amin’ny alalany ary miaraka aminy, miaraka amin’i Kristy izy. Nanjary harena ho azy i Kristy fa tsy ny fitiavan-tena, tsy ny fitapitaka, tsy ny lainga. Nataony harena i Kristy. I Kristy harena io no nozarainy amin’olona ka nahatonga ny hoe izay manapotika ny harena dia natao fakofako, ka nahatonga azy ho taranaka mpanorina. Izany no lalana ho antsika raha tiantsika ny hanorina tontolom-piainana vaovao miaraka amin’i Kristy. Aoka ho i Kristy no ataontsika ivon’ny fiainantsika sy ny harena amin’ny fiainantsika, amin’ny alalany sy miaraka Aminy ary ao Aminy no ijerena ny manodidina rehetra. I Kristy no référence tsara indrindra. Hirafitra ao amin’I Kristy tokoa anie isika. Milaza koa i Md Paoly : *“Tsy hoe*

*efa anjely aho na hoe efa lavorary aho fa miezaka aho mba hahatratra izay nahatratrarin'i Jesoa Kristy ahy*". Ho antsika koa ry Kristianina havana amin'izao fiomanana amin'ny Paka izao, tsy hoe lasa anjely isika, tsy hoe ny fahalavorariana tsy ho tratrantsika fa aoka isika hiezaka hihalavorary mandrakariva, hiala tsikelikely ny ratsy ao amintsika, hiezaka isika. Rehefa kivy isika na miezaka aza dia tsy miova ka lasa ratsy koa isika, ny ezaka ataontsika ampian'ny fahasoavan'Andriamanitra. Izany no mahatonga hoe tsy isika fa ny fahasoavan'Andriamanitra miaraka amintsika. Tsy miasa ny fahasoavan'Andriamanitra raha tsy miaraka amintsika. Izany rehetra izany koa no tiansika hipetraka mazava tsara amin'izao Sinaody izao ka na dia tsy ho lavorary aza dia mba ho hisy TOROLALANA PASTORALY hanampy antsika ho EGLIZY OLO VELONA VELOMIN'NY BATEMY MIOMBONA HO OLO ARAIKY MANDRAY AN-TANANA IRAHINA HO MISIONERA TABERNAKLA VELONA.

Tian'i Jesoa ampianarina antsika ao amin'ny Evanjely mikasika ny tantaran'ilay vehivavy mijangajanga fa samy ao anatin'ny fahotana isika olombelona rehetra ka aoka tsy hifampitsara voalohany indrindra fa samy mpanota. Jesoa tsy nilaza hoe tsara ny fahotana raha niteny izy hoe *"izay tsy nanota taminareo aoka hitora-bato"*, I Jesoa tsy manaiky izany. Ny fahotana dia ratsy mandrakariva fa kosa mandray ny mpanota izy, izany ny fampianarana ho antsika.

Na manao akory ny toetrantsika dia vonona mandrakariva Andriamanitra mandray antsika, izany no nataon'i Jesoa tamin'ilay vehivavy mijanganjanga. Isika rehetra dia mpanota ka aoka isika hanatona an'i Jesoa. Milaza amintsika Izy hoe *" izaho koa tsy manameloka anao, mandehana ka aza manota intsony"*. Amin'izao herinandro faharoa mialoha ny Paka izao, aoka hanatona ny sakramentan'ny fampihavanana isika, raiso i Jesoa na dia manao ahoana ny toetrantsika satria tsy manameloka antsika izy fa manameloka kosa ny fahotana araky ny voalazany hoe *" mandehana ka aza manota intsony "*. Izany hoe mandeha amin'ny fiainam-baovao, hiroso amin'ny Paka isika ho tonga génération de bâtisseurs manorina tontolo iainana vaovao, manorina tontolom-piainana vaovao sy tontolom-pinoana vaovao hahatonga antsika ho fanasina amin'ireo manodidina antsika ka hampiakatra ny fiainantsika, hihavao ao amin'Andriamanitra isika, hihatsara ao amin'Andriamanitra. Mandavorary ny fiainantsika ao amin'Andriamanitra isika, fiainana misy an'Andriamanitra ka amin'ny alalany sy miaraka aminy ary ao aminy no hanorenantsika ny fiainantsika. Na dia eo aza ny manodidina, ataontsika fakofako ireny fiainana ratsy ireny, ireny fiainana misy lainga, misy vandivandy, fiainana feno fitiavan-tena, fiainana feno avonavona sy fialonana ireny fa fiainana anjakan'ny rariny sy ny hitsiny, fiainana anatin'ny fifankatiavana sy fihavanana ary fiainana mikatsaka mandrakariva ny soa iombonana ny antsika ka hampivoatra ny olona manontolo ao amin'i Kristy.

Masina Maria Renin'i Jesoa, Reninay mitodika aminao izahay. Tsy miafina aminao ny fiainanay. Maniry mba ho tsara izahay ary izany no nahatonga anay manao izao Sinaody izao. Matoky ny vavakao izahay zanakao. Talahoy ny Fanahy Masina hanilo ny dinika ataonao. Aza avela hiraviravy tanana izahay na ho kivy. Md Josefa Ray Mpiaro ny Eglizy Eran-tany arovy tokoa izahay tsy ho lavo amin'ny fakam-panahin'ny hakamoana fa hazoto hivory lalandava sy hivavaka mba ho zary ho fianakaviana *"eglizy kely"* tahaka ny Fianakaviana Masina tany Nazareta. Amen

Mompera Arseveka Benjamin Ramaroson